



Inatsisartut aalajangiiffigisassaattut siunnersuut, Naalakkersuisut peqquneqassasut suleqatigiissitamik pilersitsissasut Kalaallit Nunaanni filmiliortartut silarsuaata qanoq nukittorsarsinnaananeranut innersuussuteqartussanik. Naalakkersuisut sapinngisaq tamaat suleqatigiissitami attuumassuteqartut peqataatissavaat. Siunnersuutit UPA 2023-mi saqqummiunneqassapput.

(Inatsisartunut ilaasortaq Nivi Olsen, Demokraatit)
(Siullermeerneqarnera)

Siullermik Demokraatit Inatsisartunut ilaasortaataat Nivi Olsen qutsavigerusuppara uuminnga siunnersuuteqarneranut, inuttut sukut tamatigut Kalaallit Nunaannik inuiaqatigiinnillu pisuujunerulernissamik suleqataasumut.

Eqqumiitsuliorneq assigiinngisitaartuuvoq nikerartuatuullunilu. Eqqumiitsuliorneq kikkunnut tamanut atuuppoq, pisuujugaanni pissakinnerugaanniluunniit, inuusuttugaanni utoqqaagaanniluunniit kinguariillu akimorlugit, inuit inunnulu tunngassuteqartut akornanni atassuteqartitsilluni. Eqqumiitsuliorneq inuiaqatigiinni oqallinnermik pilersitsisarpoq sukullu tamatigut kikkut tamaasa sunnertarlugit, inuttut inuiaqatigiittullu. Allatut oqaatigalugu, inuunitsinni eqqumiitsuliorneq pinngitsoorsinnaanngilarput, ullormut nipilersuummik tusarnaarutta, atuagassianik atuarutta, qalipaagutta aamma qalipakkanik isiginnaarutta, oqaluttuarisaanikkut ineriartorsimaneq eqqarsaatigigutsigu il.il. Taamaattumik isumaqartorujussuuvoq, uagut qinikkatut inuiaqatigiit assigiinngisitaartut pilersinnissaannut pitsaanerulumik sinaakkusiinissatsinnut pitsaanerulernissarput, taamaasilluta kikkunnut tamanut inissaqartitsissammat.

Eqqumiitsuliornermut aningaasaateqarfik pilersinneqartoq isumassarsiaavoq pitsaasoq. Takusinnaavarpulli, suli suliniutissatut isummiunneqartut ineriartortinnissaat pisariaqartoq eqqumiitsuliornerup ersersiteriaasaasa atituumik isiginiarnerisigut. Inuiaqatigiit nunarsuarmiooqataagaluttuinnarneranni, teknologiimik naatsorsuuteqarnerput annertusigaluttuinnarpoq, taamatullu kalaallit nipaap, piorsarsimassuserput anersaarlu nunarsuarmi tamani tigussaannortikkusullugu iliuuseqarusunnerput.

Amerikkami præsidentiusimasoq, Donald Trump, nunarsuatsinni Kalaallit Nunaat soqutigintunngortissimavaa. Taamaniillu nunatsinnut soqutiginninneq annertoorujussuanngorsimavoq, pingaartumillu meerartagut inuusuttagullu, uanga isinnik pissusissamisoortumik nunarsuarmiooqataaernermik takunnissinnaalersimallutik. Meeqqat inuusuttullu, qarasaasiami inuit naapittarfiinik, Youtube il.il. ilitsoqqussimasut nunarsuarmi pisunut annertuumik isumassarsiffigisarpaat. Atisanik ilusilersuineruppat, nipilersorneruppat imaluunniit filmiliorneruppat, nunarsuarmiooqataanerput allaqqussinnaanngilarput, inuiaqatigiittullu isiginnaartuinnarata peqataasariaqarpugut.

Ukiuni kingullerni annertuumik isiginiarneqarpoq Kalaallit Nunaannut tunngasunik nangeqattaartunik isiginnaagassiaqartoq. Amerlanertigulli suliarinnittut avataaneersuusarput, taakkulu Kalaallit Nunaat



oqaluttuarisarpaat, uaguunngitsorlu oqaluttuartut Kalaaleq 2022-mi qanoq inuuneqarnersoq. Taamaattorli inuusuttut siuarsarusuttut isigaagut. Takuarput "Tsumu" – isiginnaagassiaq Tasiilami inuusuttunut tunngasoq – kisitsisinik nuangngitsunik isornartorsiuisut allatulli nunarsuarmiooqataarusuttut. Meerartagut inuusuttagullu pinngitsoorata periarfissittariaqarpagut eqqumiitsuliornermut assigiinngisitaartumut ineriartuutissaannik peqataasinnaalernissaannik. Qularinngilluinnarpara nukissanik pilersitsissasoq piginneqataanermullu misiginnilersitsissasoq, minnerunngitsumillu ineriartortitseqqinnissamut akisussaaqataaneq pigiliunneqarsinnaasoq.

Iluarisimaarlugu maluginiarparput, Naalakkersuisut siunnersuuteqartup siunnersuummi siunertarisai isumaqatigigaat. Taamaattumik suliniut tapersersuinnarsinnaavarput, aammalu maluginiarlugu Naalakkersuisut paasissutissiissutigigaat naalagaaffeqatigiinnerup aningaasaateqarfia Nordokk II atorneqarsinnaasoq, taamatullu eqqumiitsuliornermi inerisaanissamut periarfissaassasoq.

Neriuppungali, eqqarsartaaseq Kalaallit Nunaata nipaaneernissaa tunngaviusariaqartoq, nunat allat Kalaallit Nunaannik oqaluttuarneraniunngitsoq, taamaalilluni qulaani pitsaaqutit taakkartorneqartut ilanngunneqarnissaat, taamatullu Naalakkersuisut kaammattorpakka suleqatigiissitami inuusuttortagut suleqataatissagaat.

Taamatut oqaaseqaateqarluta siunnersuut aappassaaneerneqannginnerani ataatsimiititaliami suliarineqarnissaa innersuussutigaarput suleqatigiissitap siunertaanik suliaanullu sinaakkutinik itinerusumik nassuaaniassammat, taakkulu aamma qanoq Kalaallit Nunaanni inuusuttut nipaannik akuutitsitsinissamut qulakkeerinniniarnersut.